

Aktiaateqarluni piginneqataassuteqarlunilu ingerlatseqatigiiffiit pillugit inatsisip (ingerlatseqatigiiffiit pillugit inatsisip) atuutilernissaa pillugu Kalaallit Nunaannut peqqussummut oqaaseqaatissamut Inatsisartut aalajangiiffigisassaattut siunnersuut.
(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Aappassaaneerneqarnera

Inuussutissarsiornermut ataatsimiititaliamut aktiaateqarluni piginneqataassuteqarlunilu ingerlatseqatigiiffiit pillugit inatsisip (ingerlatseqatigiiffiit pillugit inatsisip) suliarilluarneqarneranut qujassuteqarumavunga, maluginiarparalu ataatsimiitsitaliap isumaqatigiissup inatsisip atuutilerneqarnissaa innersuussutigaaat.

Ingerlatseqatigiiffiit pillugit inatsisip inatsiserpassuit allat ilagaat, taannalu Kalaallit Nunaanni ingerlatsinermi inatsisinik naleqqussaanermut siunertaqarpoq inatsisillu atuutilersinneratigut ingerlatseqatigiiffiit pillugit inatsisinik nutarsaaneq aallartinneqarpoq. Una inatsisip danskit Kalaallillu suleqatigiissitaliaata inassuteqaatigisaannut ilaavoq, suleqatigiissitaliarmi 2013-imi pilersinneqarpoq, Kalaallit Nunaanni inuussutissarsiornikkut ineriartortitsineq niuernermilu aningaasaliissutit siuarsarniarlugit siunnersuuteqartussatut suliaqassallutik.

Nutarteraluni sulineq ukiuni aggersuni ingerlanneqassaaq, Naalagaaffeqatigiit iluanni inuussutissarsiornikkut, ingerlatseqatigiiffeqarnikkut aamma naatsorsuuserisarnikkut assigiissaartumik inatsiseqarnissaq qulakkeerniarlugu. Inatsisip allat inuussutissarsiornermut tunngasut, Kalaallit Nunaanni inuussutissarsiornernerup ineriartortinneqarnissaanut siunertaqarput, inatsisillu tassaapput aktiaateqarnermut piginneqataassuteqarnermullu tunngasut, aningaasaateqarfiit inuussutissarsiornermik ingerlatsisut pillugit inatsisip, ukiumoortumik naatsorsuutinut inatsisip, naatsorsuutinut allattuisarnermut inatsisip aammalu kukkunersiuisartut naalagaaffimmit akuerisaasut nalunaarsorsimasullu pillugit inatsisip. Inatsisip pineqartut nutarterneqarneri Kalaallit Nunaanni, Danmarkimi nunanilu allani ingerlatseqatigiiffinni allaffissornikkut oqilisaassinermik kinguneqassapput.

Naalakkersuisut inatsisip nutarsarneqarneranik sulineq neriuteqarfigalugu siunnersuutip aappassaaneerneqarnissaanut innersuussutigaaat.